

■ OPINIUN

Visiuns veglias modernas

Dacurt sun jau dumandà cura ch'jau hai udì l'emprima giada dal rumantsch grischun. Jau crai che quai era en scola primara: Noss magister ans ha raquintà da Pader Placi a Spescha e che quel haja empruvà da sviluppar ina lingua per tut ils rumantschs; sumegliant al rumantsch grischun d'ozendi, ha noss magister manegià. Per nus n'ha quai betg gì ina muntada pli profunda, dentant era nagina negativa, e noss gieus han cuntinuà en la pausa sco tut ils auters dis era.

Durant mia scolaziun hai jau lura emprèndì dapli davart il rumantsch grischun, l'idea dad ina lingua scritta per nus tuts am pareva simplamain logica. Jau hai lura lavurà per la Lia Rumantscha vid il Pledari Grond online, hai emprèndì rumantsch grischun en scola ed la finala era redigì mia lavur da matura en questa lingua.

Era oz sun jau confruntà mintga di cun il rumantsch grischun, per exempel entras translaziuns da software per rumantsch. Tant pli fitg er jau dischillusiunà cura ch'jau hai vesì cun tge intensità ch'i vegn empruvà da cumbatter il rumantsch grischun. Perquai ma sun jau decidì che nus avain da mussar che questa lingua ha anc adina aderents e che nus avain da chattar in soluziun che na destruescha betg il progress dals ultims 30 onns che han rinforzà considerablamain il Rumantsch.

Lain pli gugent investir noss temp en il svilup dal rumantsch grischun, lain al dar la charn che blers pretendan ch'ella al manchia, lain far in pass en direcziun d'INA Rumantschia, empè da puspè duvrar 50 onns ditg nossas energias per ans cumbatter. Che l'ABC-alpin da Pader Placi a Spescha ha fatg naufragi è forsa chapaivel: las vals grischunas giaschan lunsch dapart e la comunicaziun è difficila. Anc oz giaschan las vals medem lunsch dapart. Dentant ans collian radio, televisiun, telefon, internet e la Viafier retica talmain che la visiun dad ina Rumantschia vess oz bain dad esser cuntanschibla.

Gion-Andri Cantieni, Sagogn